

Na osnovu člana 174. stav (1) Zakona o vodama („Službene novine Federacije BiH“, broj 70/06) federalni ministar poljoprivrede, vodoprivrede i šumarstva u saradnji sa federalnim ministrom finansija/financija d o n o s i

**PRAVILNIK
O IZMJENAMA I DOPUNAMA PRAVILNIKA O NAČINU OBRAČUNAVANJA,
POSTUPKU I ROKOVIMA ZA OBRAČUNAVANJE I PLAĆANJE I KONTROLI
IZMIRIVANJA OBAVEZA NA OSNOVU OPĆE VODNE NAKNADE I
POSEBNIH VODNIH NAKNADA**

1. U Pravilniku o načinu obračunavanja, postupku i rokovima za obračunavanje i plaćanje i kontroli izmirivanja obaveza na osnovu opće vodne naknade i posebnih vodnih naknada („Službene novine Federacije BiH“, br. 92/07 i 46/09) u Poglavlju IV. NAČIN PLAĆANJA VODNIH NAKNADA u tački 44. iza riječi: „naknada i“ dodaju se riječi: „po jedan“, a iza riječi: „iskazima“ briše se tačka i dodaju se riječi: „i nadležnoj organizacionoj jedinici Porezne uprave Federacije BiH u roku određenom za predaju računovodstvenih iskaza.“

2. U Poglavlju V. KONTROLA OBRAČUNAVANJA I PLAĆANJA VODNIH NAKNADA u tački 45. na kraju teksta briše se tačka i dodaju riječi: „u skladu sa Zakonom o Poreznoj upravi Federacije Bosne i Hercegovine („Službene novine Federacije BiH“, br. 33/02, 28/04, 57/09 i 40/10) i podzakonskim aktima donesenim na osnovu tog zakona.“

Iza stava 1. dodaje se novi stav 2. koji glasi:

„Za sve postupke i procedure u vezi plaćanja vodnih naknada, razreza, naplate, prinudne naplate vodnih naknada, inspeksijskog nadzora, obračuna i naplate kamata, rokova zastare, povrata, žalbi na rješenja primjenjivat će se odredbe Zakona o Poreznoj upravi Federacije Bosne i Hercegovine.“

3. Tačka 46. mijenja se i glasi:

„46. Kontrolu pravilnog obračunavanja i plaćanja PVN i blagovremenost dostavljanja popunjenih i ovjerenih obrazaca iz tač. 41. i 44. ovog Pravilnika vršit će vodna inspekcija odnosno ovlašteni zaposlenici nadležne agencije za vode. Vodni inspektor odnosno ovlašteni zaposlenik nadležne agencije za vode dužni su sačiniti zapisnik o izvršenoj kontroli.

Ukoliko obveznik vodnih naknada u ostavljenom roku ne postupi po zapisniku iz stava 1. ove tačke, vodni inspektor odnosno ovlašteni zaposlenik nadležne agencije za vode, dostavit će jedan primjerak zapisnika organizacionoj jedinici Porezne uprave Federacije Bosne i Hercegovine na čijem području je sjedište pravnog lica, odnosno mjesto obavljanja djelatnosti fizičkog lica koji će ovlaštenim službenicima Porezne uprave Federacije BiH služiti kao dokaz u postupku donošenja rješenja o dodatno utvrđenim obavezama.“

4. U Prilogu 1. u naslovu iza riječi „otpadnih voda“ dodaju se riječi: „za zagađivače koji vrše direktna mjerenja“.

5. U Prilogu 1. u poglavlju IV. UTVRĐIVANJE (IZRAČUNAVANJE) BROJA EKVIVALENTNIH STANOVNIKA jednačina (1) mijenja se i glasi:

$$"EBS = \{E_{om}; E_{sm}; E_N \text{ ili } E_P\}_{max} + E_{tok} + R_T \quad (1)"$$

Stav 2. mijenja se i glasi: „U formuli (1) za EBS uvrštava se E_{om} ; E_{sm} ; E_N ili E_P ovisno od toga koja je vrijednost veća“.

U IZVJEŠTAJU O UTVRĐIVANJU EBS-a iza riječi:

„Kapacitet proizvodnje: _____ dodaju se riječi:

„Elaborat mora sadržavati slijedeće elemente:

1. korištene analitičke metode za svaki kontrolirani parametar kvaliteta i kvantiteta,
2. tabelarni prikaz rezultata svih dvosatnih kompozitnih uzoraka
3. broječanu vrijednost i grafički prikaz izračuna rezultata testa toksičnosti na testni organizam *Daphnia magna*. (Test toksičnosti 48hLC50),
4. sažetak tehnološkog postupka sa grafičkim prikazom,
5. situaciju odvodnje i tretmana otpadnih voda.“

6. U Prilogu 10. u obrascu „OVN“ u koloni Visina opće i posebnih naknada za vodnu naknadu za zaštitu voda za uzgoj ribe broj: „0,04“ mijenja se i glasi: „0,05“.

U obrazloženju popunjavanja obrasca „OVN“ tačka 10. se mijenja i glasi: „ Obrazac se popunjava u tri primjerka od kojih se u skladu sa tačkom 44. ovog Pravilnika po jedan ovjeren primjerak dostavlja instituciji nadležnoj za prijem računovodstvenih iskaza i Poreznoj upravi Federacije BiH, a treći obveznik zadržava za vlastite potrebe“.

7. Ovaj Pravilnik stupa na snagu narednog dana od dana objave u „Službenim novinama Federacije BiH“.

Broj: 05-1-25/17-1215-6/11
Sarajevo, 09.11.2011. godine

MINISTAR

Jerko Ivanković-Lijanović

